

Martxoaren 21ean
GARIZUMAKO 5. IGANDEA

Agurra

Bihotz-berritzera dei egiten digun Jesu Kristoren grazia eta maitasuna zuekin.

Sarrerako oharpena

Garizumako azken igandea dugu gaurkoa, datorren igandean hasiko baitugu, Erramuekin, gure fedearen ASTE NAGUSIA. Jesus, Jerusalemera gerturatzen ari da eta berarekin darama Eliza osoa, historiaren une erabakigarria: bera da Jainkoaren Semea, bizia ematera mundura etortzekoa zena.

Goazen gu ere Jesusekin. Elkar onartuz, inor gaitzetsi gabe, denean maitasuna eta bihotz ona agertuz.

Damu-otoitza

Gure fedearen misterioa ospatzera bildu gara. Eska dezagun lehenik barkamena eta onar dezagun Jainkoaren erruki berritzailea.

- Jesus Jauna, gure sufrimenduetan samintzen **za**ren Senidea: erruki, Jauna.
- Jesus Jauna, gu bizi-araziz goresia za**ren** Jainko-Semea: Kristo, erruki.
- Jesus Jauna, gu heriotzatik ateratzen gaituzun Piztu**er**a eta Bizia: Erruki, Jauna.

Erruki dakigula Jainko guztiz ahaltsua, eta, gure bekatuak barkaturik, eraman gaitzala betiko bizira.

Otoitza

**Jainko gure Jauna, zure Semeak
bere bizia emateraino maite izan zuen mundua;
egizu, guk ere maitasun bera izan dezagula beti.
Zure Seme Jesu Kristo gure Jaunaren bitartez,
Zurekin eta Espiritu Santuarekin batean
Jainko eta errege bizi baita gizaldi eta gizaldietan.**

Hitzaren liturgiari oharpena

Beharrezkoa dugu, egunero Jesusengana hurbiltzea eta ezagutuko ez bagenu bezala, begi-zabalez eta ikasteko gogoz begiratzea. “Betiko kristau” garenok dena dakigula uste badugu ere, asko dugu ikasteko oraindik Nazaretarraren bidean.

Lehenengo irakurgaia (Jr 31, 31-34)

Jeremias Profetaren liburutik

Hara, badator –dio Jaunak— Israel herriarekin eta Juda herriarekin itun berria egingo dudan garaia. Ez da izango Egiptotik ateratzeko eskutik hartu nituenean haien arbasoekin egin nuena bezalakoa, haiek hautsi egin baitzuten nire ituna, Ni haien nagusia izan arren, dio Jaunak.

Hona hemen etorkizunean Israelekin egingo dudan ituna, dio Jaunak: Barruan ezarriko diet neure legea eta bihotzean idatziko. Ni haien Jainko izango naiz, eta haiek nire herri izango dira.

Ez dute elkarri irakatsi beharrik izango, “Ezagutu Jauna” esanez, denek, txiki nahiz handi, ezagutuko bainaute, dio Jaunak; barkatu egingo baitiet gaiztakeria, eta haien bekaturik ez baitut gehiago gogoan izango».

Erantzun-salmoa (*Sal* 51 [50], 3-4. 12-13. 14-15)

Bi-hotz gar-bi - a gu-gan sor - tu, ar-nas biz-ko -
 rra bar-ne mui-ne - tan e-ma-gu - zu.

Erruki zakizkit, ene Jainko, zeure **maitasunaz**,
 suntsitu nire hobena zeure neurrigabeko **gupidaz**.
 Garbi nazazu zeharo neure **errutik**,
 garbitu neure **bekatutik**. R/.

Ene Jainko, sortu bihotz gar**bia** nigan,
 berritu arnasa sendoa nire **barnean**.
 Ez nazazu bota zeure **aurretik**,
 ez kendu niri zeure arnasa **santua**. R/.

Poztu nazazu berriro zeure **salbamenaz**,
 sendo nazazu zeure arnasa **oparoaz**.
 Erakutsiko dizkiet gaiztoei zure **bideak**,
 eta Zugana bihurtuko dira **bekatariak**. R/.

Bigarren irakurgaia (*Heb* 5, 7-9)

Hebrearrei egindako gutunetik

Kristok, bere giza bizitzaldian, deiadar handiz eta negarrez egin zion otoitz eta erregu heriotzatik libra zezakeen Jainkoari, eta, Kristok begirune izan ziolako, entzun egin zion Jainkoak. Eta Semea izanik ere, oinazearen oinazez ikasi zuen obeditzen; horrela, bere betera iritsirik, betiko salbamenaren iturri bilakatu zen obeditzen dioten guztientzat.

Ebanjelio-aurreko gorapena (Jn 12, 26)

Nire zerbitzari izan nahi **du**enak,
 jarrai biezat, **di**o Jaunak,
 eta Ni nagoen **to**kian,
 han izango da nire zerbitzaria **a** ere. R/.

Ebanjelioa (Jn 12, 20-33)**Homiliarako argibideak***Gari-alea hiltzen ez bada*

«Gari-alea lurrera erori eta hiltzen ez bada, bakarrik geratzen da; baina hiltzen bada, fruitu asko ematen du». Ez da Jesusek nekazarien bizitzatik ateratzen duen irakaskuntza bakarra. Ebanjelioa nekazaritzatik zetozen parabolez, irudiz eta ideiaz beteta dago. Garai batean (eta oraindik ere hainbat herritan) jende gehienaren lanbidea zen. Ereileaz, soroetako lanaz, segaz, gariaz, ardoaz, olioaz, pikondoaz, mahastiaz, mahats-bilketaz... hitz egiten du Jesusek askotan.

Baina Jesus ez zen, noski, nekazaritzan gelditu. Gari-alearen irudiak gorengo irakaskuntza bat irakasteko balio du, argia ematen duena, ezer baino lehen, bere kasuan, eta bere ikasleengan.

Gari-alea, batez ere, Jesus bera da. Gari-ale bat bezala, Bera bere nekaldian eta heriotzan lurrera erori zen, berriro agertu da eta bere berpizkundearekin fruitua eman du. Berak eman duen «fruitu handia» bere heriotzatik jaio den Eliza da, bere gorputza.

Izan ere, «fruitua» gizadi osoa da -ez bataiatuok bakarrik -, Bera hil zelako, denak salbatuak izan gara, baita horretaz jabetu ez dena ere. Ebanjelio pasartea Jesusen hitz esanguratsu hauekin amaitzen da: «Nik, lurretik altxatzen naizenean, denak erakarriko ditut niregana».

Baina gari-ale txikiaren historiak, geure burua eta gure izatearen zentzua ulertzen ere laguntzen digu. Gariari buruz hitz egin ondoren, Jesusek hau gehitu du: «Bizitza maite duenak galdu egiten du; eta gorrotatzen duenak (beste ebanjelista batek dio «bizitza galtzen duenak») gordeko du betiko bizitzarako» (Mt 16, 25). Lurrera erori eta hiltzea ez da, beraz, fruitua emateko bidea soilik, «norberaren bizitza salbatzeko» bidea ere bada, hau da, bizitzen jarraitzeko bidea! Zer gertatzen da lurrera erortzeari uko egiten dion gari-alearekin? Edo txoriren bat etorri eta mokokatu egiten du, edo txoko heze batean lehortu edo lizundu egiten da, edo irin izateko ehotua izango da eta hor amaitzen da dena. Nolanahi ere, aleak, berez, ez du jarraitu. Erein egiten badute, berriz agertuko da eta bizitza berri bat ezagutuko du; urtaro honetan ikusten dugunez, udazkenean ereindako gari-aleekin udaberria gertatzen da.

Gizakiari eta espirituari dagokienez, horrek esan nahi du gizakia ez bada fedea eta bataioak ekarritako bidetik igarotzen, gurutzea onartzen ez badu, baizik eta bere izateari eta egoismoari lotuta geratzen bada, dena amaituko zaio. Gaztaroa, zahartzaroa, heriotza. Aldiz, Kristorekin batera gurutzea sinetsi eta onartzen badu, betiereko ortze muga irekiko zaio, betiko bizia zabalduko.

Gari-alearen parabolak, bizitza honetako egoera asko argitzen ditu. Asko axola zaizun proiektu bat duzu; haren alde lan egin duzu, bizitzako helburu nagusia bihurtu da, eta hara non, handik gutxira, lurrera erorita eta hilda ikusten duzun. Porrot egin du; edo, agian, kendu egin zaizu eta bere fruituak jasotzen dituen beste bati eman

zaio konfiantza. Gogoratu gari-alea eta itxaron. Gure proiektu eta afektu onenek (batzuetan senar-emazteen ezkontzak berak) iluntasun eta negu hotzeko fase honetatik igaro behar dute, araztuak eta fruituez beteak izateko. Probari aurre egiten badiote, altzairua bezalakoa dira, ur izoztuan murgildu eta «epel» atara ondoren. Beti bezala, Ebanjelioa ez dago urrun, gure bizitzatik oso gertu baizik. Gari-ale txiki baten historiarekin ere hitz egiten du.

Azkenean, lurrean erortzen diren eta hiltzen diren gari-pikor horiek gu geu izango gara, egun batean lurperatuak izango garenean. Baina Jesusen hitzak dio guretzat ere udaberria izango dela. Berpiztu egingo gara heriotzatik, eta orduan gehiago ez hiltzeko biziko gara.

Jainkoaren herriaren otoitza

Egigun otoitza, senide maiteok, eta eska dezagun Jaunaren errukia, bere herriarekiko onginahiz beterik gure eskariak entzun ditzan:

Erantzuna: Kyrie, eleison!

Ky-ri-e, Ky-ri-e, e - lei-son! Ky-ri-e, Ky-ri-e, e - lei - son!

—Bere herria biziartzeko bere burua heriotzara eman zuen munduaren Salbatzaileak, Eliza gaitz guztitik libra dezan. Egigun otoitza. R/.

—Gurutztatu zutenen alde gurutzean otoitza egin zuen munduaren Salbatzaileak, bekatarien alde Aitaren aurrean bitarteko egin dezan. Egigun otoitza. R/.

—Gurutzean sufrimendua eta ezina pairatu zituen munduaren Salbatzaileak, sufritzen duten guztiekin erruki izanez indarra eta laguntza eman diezaien bere minetan. Egigun otoitz. R/.

—Egun hauetan Bere Gurutze-bidea gurtu eta oroitzeko prestatzen garenok, munduaren Salbatzaileak bere piztueraren garrez indaberri gaitzan. Egigun otoitz. R/.

Entzun Aita, itun berri eta betikoa eratzeko gurutzeko heriotzaraino esaneko egin zen Zure Semearen otoitzak; egizu, bizitzako probaldien bidez jakin dezagula Bere nekaldian parte hartzen eta hiltzen den haziaren emankortasuna iritsirik, uzta on bezala biltzea merezi dezagula Zure erreinuko biltegietan. Jesu Kristo gure Jaunaren bitartez.

Prefazioa

Garizumako I. edota II. prefazioak erabil daitezke (Meza liburua 478-480 orr.).

Egokia da, gaur, 4. Eukaristi Otoitza erabiltzea ere, bere prefazioarekin, B urteko igandeetako irakurgaietan azaltzen diren Jainkoaren itun ezberdinak Kristorengan betetzen direla adieraziz.

Jaunartze-ondorengo otoitza

**Jainko ahalguztiduna, egizu,
orain Kristoren Gorputz Odolekin bat egin dugunez gero,
haren gorputzeko atal izan gaitzela beti.
Errege bizi baita gizaldi eta gizaldietan.**

Herriaren gaineko otoitza eta bedeinkapena

Jauna zuekin. R/. Eta zure espirituarekin.

Makur zaitezte, Jaunaren bedeinkapena hartzeko.

(Eskuak herriaren gain zabalik bedeinkapena esango du:)

**Bedeinka ezazu, Jauna,
zure errukia itxaro duen zeure herria,
eta emaiozu bihotz zabalez Zuk argiturik eskatzen duena.
Jesu Kristo gure Jaunaren bitartez. R/. Amen.**

**Bedeinka zaitzate! Jainko ahalguztidunak:
Aitak, eta Semeak, + eta Espiritu Santuak. R/. Amen.**

Zoazte Jaunaren bakean. R/. Eskerrak Jainkoari.

Herriaren gaineko otoitzaren ordeztan, erabil daitezke Bedeinkapen Nagusia (Ikus Liburuxka honetan 4. or.).

Oharra

Ohartarazi datorren igandea Erramu eguna dela,. Mezen ordutegia eman ez eta egun horretako diru-bilketa Caritasen beharretarako izango dela gogoraraziz.